

Meeqqanut suli atualersimanngittunut naleqquttumik Kullorsuarmi perorsaanikkut ineriartornissamut neqerooruteqalersinnaanermut tunngatillugu sanaartornikkut pisariaqartitsinerup misissuiffigineqarnissaanik Naalakkersuisut peqquneqarnissaat pillugu Inatsisartut aalajangiiffigisassaattut siunnersuut. Misissuinerup ilaliullugu kommunimut pineqartumut inassuteqaatinik suliaqartoqartariaqarpoq, nammineq killiliussat iluanni pisariaqartitsinerup tamatuma naammassiniarneqarsinnaanera pillugu.

(Inatsisartunut ilaasortaq Hans Enoksen, Partii Naleraq)

Pillugu

**Kultureqarnermut Ilinniartitaanermut Ilisimatusarnermut Ilageeqarnermullu
Ataatsimiititaliap**

ISUMALIUTISSIISUTAA

Siunnersuutip aappassaaneerpeqarnerani saqqummiunneqartoq

Suliarinninnermi ataatsimiititaliaq ukuninnga inuttaqarpoq:

Inatsisartunut ilaasortaq Steen Lynge, Atassut, Siulittaasoq
Inatsisartunut ilaasortaq Vivian Motzfeldt, Siumut, Siulittaasup tullia
Inatsisartunut ilaasortaq Randi V. Evaldsen, Demokraatit
Inatsisartunut ilaasortaq Peter Olsen, Inuit Ataqaatigiit
Inatsisartunut ilaasortaq Mimi Karlsen, Inuit Ataqaatigiit

UPA2015-mi siunnersuutip ulloq 25.marts 2015 siullermeerlugu suliarineqarnerata kingorna ataatsimiititaliamit suliarineqarpoq.

Siunnersuutip imarisaa siunertaalu

Siunnersuuteqartup siunnersuutikkut kissaatigaa, meeqqanut suli atualinngitsunut perorsaanikkut ineriartuutaasumik Kullorsuarmi ulluunerani paaqqinnittarfimmik sanaartortoqarnissaanik pisariaqartitsineq pillugu misissuinissamik qulakkeerinninnissaq pillugu Naalakkersuisut kommunimik pineqartumik oqaloqatiginninnermik aallartitsinissaat pillugu inatsisartunit peqquneqarnissaat. Siunnersuutikkut kissaatigineqarpoq nunaqarfimmi Kullorsuarmi meeqqamut suli atualersimanngitsunut ulluunerani paaqqinnittarfiit

pitsanngorsarneqarnissaat. Taamaalillugulu siunnersuuteqartup misissuineranut atatillugu kissaatigaa kommuni pineqartoq meeqqanut sulii atualinngitsunut ulluunerani paaqqinnittarfimmik pisariaqartitsineq qanoq ilillugu pitsaanerpaamik kommunip nammineq sinaakkutissarititami iluani aqqissinnaaneraa misissorneqassasoq.

Siunnersuutip inatsisartuni siullermeerlugu suliarineqarnera.

Inatsisartuni amerlanerussuteqartut, siunnersuutigineqartup naalakkersuisunit aallartinniarneqarnera tunngavigalugu siunnersuut tapersinngilaat.

Meeqqat sulii atualinngitsut atugarisaat pillugit pissutsinik nuna tamakkerlugu nalunaarusiornissamut aamma pisariaqartitsineranut misissuinissamut Naalakkersuisut kommuninik suleqateqarlutik aallartissimanerat ataatsimut isigalugu partiini ikinnerussuteqartut siunnersuut ilalerpaat.

Ataatsimiititaliap siunnersuummik suliaraqarnera.

Nuna tamakkerlugu pissutsinik pisariaqartitsinermillu misissuineramik aallartittoqarnissaanik Naalakkersuisut kommunillu suleqatigiillutik sulissuteqalersut Naalakkersuisut akissuteqaamminni erseqqissaatigaat. Suliami tassani meeqqanut sulii atualinngitsunut pissutsit pineqarput. Ilanngullugulu Naalakkersuisut ilisimatitsissutigaaat kommunini sanaartornermut immikkoortuni tulleriiarinermi ilanngunneqarnissaat suliap inernerissagaa. Tamannalu aamma kommunip pineqartup kissaatigippagu Kullorsuarmi atuutissaaq.

Siunnersuut akuerineqassapat suliami matumani Naalakkersuisut illumik tamatigoortumik sanaartortoqarnissaanik periarfissat eqqarsaatigissagaat ataatsimiititaliamit kaammattuutigineqarpoq. Illumik taamaattumik sanaartorneq pisariaqartitsiffiusunik amerlanerusunik matussusiisnaavoq, tamatumunnga ilaallutik, meeqqanut paaqqinnittarfik, sunngiffimmi timersornermilu atortorissaarutit.

Siunnersuummik ataatsimiititaliap suliaraqarnermini maluginiarpaat siunnersuutip qulequtaata Danskisuuani kalaallisuanilu annikitsumik assigiinngissuteqartoqartoq.

Danskisuuani kissaatigineqarpoq Naalakkersuisut siunnersuutigineqartutut oqaloqatigiinneq aallartissagaat 2015-mi. Siunnersuutip uuma kalaallisuunngortinneqarnerani piffissamut killiliunneqartoq ilaanngilaq kiisalu kommunip pineqartup oqaloqatigineqarnissaa amingaataapput. Oqaloqatigiinnerup kissaatigineqartup ukioq manna aallartinneqarnissaa ataatsimiititaliamit paasineqarpoq, taamaattumillu ataatsimiititaliami ikinnerussuteqartut isumaliutissiissummi matumani siunnersuutip kalaallisuanut allannguutissamik siunnersuuteqarlutik.

Meeqqanut suli atualinngitsunut tunngatillugu sanaartornissamut pisariaqartitsineq tunngavigalugu Naalakkersuisut kommunillu suleqatigiinnissaannik siunnersuummi siunertarineqartutut isumaqatigiittoqareersimasoq ataatsimiititaliamit taamaalillugu naggataatigut paasineqarpoq. Taamaalilluni ataatsimiititaliaq siunnersuummut ilusimisut iluseqartillugu annerusumik oqaaseqaatissaqanngilaq.

Ataatsimiititaliap inassuteqaatai

Ataatsimiititaliami **amerlanerussuteqartut** Atassut, Siumut aamma Demokraatit allannguutissatut siunnersuut taamatuttaarlu aalajangiiffigisassatut siunnersuut itigartinneqassatut innersuussutigaat.

Ataatsimiititaliami **ikinnerussuteqartut** Inuit Ataqaatigiit siuliani saqqummiunneqartut tunngavigalugit matumuuna siunnersuutip kalaallisoortaani allannguutissatut siunnersuuteqarput.

“Kommunip pineqartup oqaloqatigineratigut Meeqqanut suli atualersimanngettunut naleqquttumik Kullorsuarmi perorsaanikkut ineriartornissamut neqerooruteqalersinnaanermut tunngatillugu 2015-mi sanaartornikkut pisariaqartitsinerup misissuiffigineqarnissaanik Naalakkersuisut peqquneqarnissaat pillugu Inatsisartut aalajangiiffigisassaattut siunnersuut. Misissuinerup ilaliullugu kommunimut pineqartumut inassuteqaatinik suliaqartoqartariaqarpoq, nammineq killiliussat iluanni pisariaqartitsinerup tamatuma naammassiniarneqarsinnaanera pillugu.”

Ataatsimiititaliami **ikinnerussuteqartut** Inuit Ataqaatigiit matumuuna allannguutissatut siunnersuut akuerisassanngorlugu innersuussutigaat.

Taamatut oqaaseqartuni isumaliutissiisummilu allassimasutut paasinnilluni matumuuna ataatsimiititaliap siunnersuut aappassaanniigassanngortippaa.

Steen Lynge, Siulittaasoq

Vivian Motzfeldt

Randi V. Evaldsen

Peter Olsen

Mimi Karlsen